

由康堂詩集

卷之四
塞下



塞下草序

余小子鎬往嘗備役于越時走括
蒼道望大小僊都山問軒轅鼎湖
阮容栖隱處見玄雲碧洞滿古譜
雲墟上應牛宿下當少陽之位思
二百年來寧無復有英瑋神明

之士生乎其間如青田郁離子黎
眉公籌帷戡亂保大定功稱中興
之傑者乎維時今觀察使鄭邦章
先生方顯忝天署殷：負巖廟重
望非余所敢問交然時若猥及于
余者久之觀察輒解玉歸臥金龍

愚公諸洞有愚台草超然有出世
之思又久之起家握兵符提督三閩
重地則有上台草無何摠憲秦閩
開牙榆林塞上余則備役皋蘭時
脩聞問遂函二編以相示且詔余
曰丘壑靜觀頗見端倪金革磨練

方有湊泊噫此覺後語哉觀蒼命
世才也其道在康濟其用在封疆
社稷其趣絕塵壻九千仞之表故
處則蟄龍幽吟出則風雨舒嘯今
瀆愚谷宛見名山洞壑水國靈墟
其聲懸曠清越脩然塵外數致有

僊靈氣瀆上谷則肆叱風雲拍搗
衛霍其聲悲雄忼慨儼然剡鋒摩
壘有折衝氣大都神駢格壯興遠
才超摠之得愚谷靜觀十年合力
進乎道矣豈徒詩云乎哉以故用
之金革有如宜僚弄丸赫教素羽

即鞞鼓心營愉如也聲詩厲不朽
勝業兵戎為撥亂大事嘗讀崑高
祭民諸篇謂尹吉甫一詩人耳乃
太原之役以大將成功故頌者曰
文武吉甫萬邦為憲蓋嘉其伐而
美其無也若觀察者無之於青田
有佐命勛其文炳然在焉觀察際
中興盛美時方雍容挈大將旗鼓
登壇狎主盟不敏鎬願佐下風以
觀論著之大者

萬曆癸巳夏五潮陽周光鎬國雍

甫纂

周光鎬

國雍

塞下草叙

崑巖多自上谷來夷門夷門物色
故溝沆決鬱猶有古雄風焉予先
至每馮之不自禁及得一當多懷
古交相深也于時倥偬行役無能
各輸其歡不決旬而多以塞帷又

指榆闕矣則予寔不能別公酒間
耳熱不覺擊壺起舞而歌出塞入
塞之聲公亦謔壯予志而重別予
則出其上谷吟曰此塞下曲也子
試歌其節而引其端若相將搏燕
雲而御雄風乎則予始得讀上谷

吟每一讀而髮上指再讀而恍在
赤城后臺間激流霞舉驚飈所謂
飛將軍乎斯亦竒矣丈夫束髮經
世務其要在秉道執矩兼總九深
羽儀百代以為人倫先不則馮陵
瀚海題碣燕然陰山落鵬雲中射

帟無使天下得傲文士無一障之用
以昔典天官郎不啻公琰之表壺
臥十年復起臨上谷出榆關徙南
幕之庭寒西人之膽兼文武而憲
之則丈夫弘業兩足愉快又賈其
餘勇而發之篇章固宜其卓犖若
斯之盛哉今公且拜大中丞治齊
都矣稷下之業其小之者也公將納
溟渤之衆深馳泰岱之宏覽八閩
里之堂收孔壁之略考禮論樂以
大經世之事于是陳風稱詩其繼
三百篇而作乎予浚夕不一月而

太夷門遙，間關入蜀矣。其雄心
兀，目眈眈然登大峨之顛。有洋
洋大風東來，而聳我裾者，猶遙憶
中丞之為大國吟也。

楚人梅園樓拜謨



由庚堂詩集卷之四

塞下草目錄

出塞曲 三首

升天行 二首

白紵詞

塞下曲 四首

猛虎行

燕歌行

將進酒

野田黃雀行

結客少年場行

飲馬長城窟行

妾薄命

梅花引

黃鵠篇

黍離操

招隱辭

思歸引

烏栖曲

三首

上谷秋懷

四首

漢關壽亭侯像長歌

冬日偕吳直指視塞雲州少憇靈真觀賦

咏赤城湯泉

夜度雞鳴驛

登獨石亭

遊滴水崖朝陽觀

獨石臺新成同吳直指撫夷紀事

讀太僕王公平蠻督木傳賦五言排律二

十韻

白登道中逢春感述

李子敬謁銓過訪赤城喜而有作兼懷鐵
城叅知

朝陽觀對雪

陪直指閱營校射 二首

夏入雲中韓憲使惺菴招飲柳河得流字
後出塞有懷鐵城叅知遂寄斯章

雪中送郭中丞歸東魯

將赴大梁留別上谷諸僚長

過保安謁沈青霞先生祠

送葛逸人之太和期來春過余東海

樊季思謁銓訪余大梁賦此爲贈余與季

思築塢紫芝將煉藥老焉今各出山故
未句及之

壬辰九日從諸公遊鴈塔曲江二院晚歸

簡涵臺憲長

客歲九日涵臺萬公攜遊曲江業成一詩
未寄今歲是日公書來自晉再用前韻
却寄

清澗道中

雄石碇

榆林中秋書懷

十首

余奉東撫之

命發自榆林父老殷勤戀

別媿而賦此

虎牢關

宋陵

會盟臺

望少林

甲辰春日赴秦計部高臺之宴賦此

榆林虜旣款塞歲復有季李大將軍置酒

春宵盛張鐙樂卽事有作

鐵城先生書訊邊事兼惠新詩奉荅

二首

元夕書懷

樊季崇內弟五表賦贈

太平宴歌

喜何无咎至自永嘉有作

上春公讌卽席口占簡諸觀察

甲辰生日時在榆林

重遊雄石硤

汪鼎甫從余出塞嚮道甚勤詩以勗之

月夕

夏日赴秦計部郊讌

由庚堂詩集卷之四

塞下草

縉雲鄭汝璧邦章甫著

出塞曲 三首

晨風厲長阪徒御何嘽嘽陰曠蕩寒日遙見臯
蘭山金城限天塹百雉嚴重關七萃盡河朔猛
氣何桓桓皇威望沙漠青海無驚瀾衣袂有深
戒對食還忘食佳兵古所慎念茲良獨難
俊鶻思掣鞬良驥恥伏櫪壯士騁雄圖勛名起

沙磧斥堠夜傳烽邊關曉飛檄厲部登層陴單
于在西北胡馬蹴平沙陽光黯無色驍騎四五
動迅奮無堅壁後隊未渡濠前軍已俘馘振旅
奏饒歌轅門殊未夕

王者示無外耀德不觀兵讐習匪夙戒安用存
空名高秋塞草白代馬驤且鳴駕言飭蒐乘射
獵出邊城將士一何勁喑嘯驅風霆白日耀戈
甲黃雲掣干旌左乘搏雕虎右乘殲奔麋吐谷
罷南牧呼韓走先聲伐謀貴合變綏馭良有程

豈必事剽戮言要麟閣榮

升天行 二首

圓儀廓泰宇蒼蒼何沈寥玉蚪肅我駕睠言凌
九霄乘躋首天路泠泠御鮮飈絳闕窅無極隱
隱聞琳瑯左顧廣成子右招王子喬竦身灑氣
上嘯傲青霞標萬里始一息汗滂神何超指顧
瞰瀛海蹄涔不容舸塵世苦刺促蠅營良以勞
寧知八極表千載方崇朝

初日浴咸池言晞九陽髮采采若木華芝童導

前節朝禮玉晨臺夕憇丹霞闕珠幢恍飄颻金
支炯明滅太始合玄符凌虛故超越華池灌靈
根神膏自凝結九无翳霄暉精熒流紺雪兩腋
生羽翰永與人寰絕焦冥亦何爲夢夢戲蟲睫
白紵詞

東風蕩漾楊花飛珠簾銀蒜圍春暉美人含嬌
出羅幃雙蛾揚淥送斜睇輕盈雅步若靡依齊
紈越羅裁舞衣迴霄垂手節音徽博山沉水流
烟霏東方月明珠斗稀千載奉君君莫違

君有旨酒盈瓊觴妾有舞袖熏都梁嘉賓萃止
開華堂繁花璀璨吐芬芳錦茵斜壓金鳳皇尊
前拂舞清音揚綺琴寶瑟間笙簧主人問客夜
渠央梁塵欲飛簾有霜千載奉君君莫忘

塞下曲 四首

朔風胡雁黑河流漢月秦關紫塞秋爲語陰山
猶轉戰閨中空望大刀頭
百戰會教毳帳空更驅千騎獵湟中亦知吏議
深持法不分君恩薄報功

乘障銜枚晚渡濠陰風獵獵響弓刀玉關欲滿
擒胡月絕塞愁看太白高

去歲防秋出鞏昌今春移戍備燉煌翠樓西望
腸應斷飛夢空教渡漢陽

猛虎行

嗟爾猛虎日肉麋與麋夜傷赤彪臥朝從玄豹
嬉胡爲乎去爾之宅游彼中逵騰躩不及展爪
牙無所施嗟嗟兮虎而解一掉尾戢威尚有餘怖
豢不爾生恐決之怒維食有獮曰麋及兔直視

眈眈不忘故處解二張我弓兮操我戈虎逸圈兮

知奈何解三

燕歌行

遼陽木落草具腓蒲海天寒鴻鴈飛月明皎皎
低入扉流輝忽照鴛鴦機念君從戎出武威塞
垣萬里音塵稀瓜期已及胡不歸中夜耿耿賦
無衣賤妾閒寂守空幃錦衾凝霜風裂肌思君
想像見容暉夢中彷彿向金微覺來徬徨是耶
非撫枕掩泣空歔歔百年鼎鼎與願違人生幾

日房堂詩集卷之四
何朝露晞

將進酒

將進酒呼叵羅爲君起舞舞且歌六龍飛轡不
相待十洲僊闕空嗟峨君不見見玉魚金盃前朝
墓樵牧猶知北邙路荒烟毳兔出挺肩斜日饑
鷹嘯枯樹又不見平原隴麥青油油云是昔時
歌舞樓遺簪墮珥土花碧春犁折斷珊瑚鈎今
古豪華亦何有何物浮名能不朽達哉張季鷹
不如一杯酒絳河月出明星稀進君之酒君莫

違東方欲曙城烏飛

野田黃雀行

黃雀飛飛以息掠野田
啜我稷毛微噉短易足
食黃鵠飛鼓其翼遨四海
遊八極南山尉羅北
山弋履危機安可測

結客少年場行

自負幽并俠常從許史游
千金訓駿馬七寶飾
純鈎度曲教周史當壚調
莫愁酒酣輕宿將
白首未封侯

飲馬長城窟行

驅馬長城下飲馬交河流燕支接大漠朔氣橫
高秋飛騎何赳赳六郡雄邊州論功萬戶賞選
士千金酬一舉犁老上再舉殲渠搜轉戰蒲海
外勒石條支頭歸來報天子何論龍額侯

妾薄命

耀靈出滄海皦皦燭扶桑鳴雞已戒旦晨曦流
洞房佳人攬衣起出戶曳鳴璫當軒理清曲哀
音不成章自言秦氏女姣好世無雙十三工組

繡十五織流黃十六爲中婦夫壻期門郎夫壻
從門來寶馬爛生光朱甍翼飛閣畫戟森高堂
交牕罽綈錦文茵薦象牀流蘇九華帳四角垂
香囊雙絲合歡被一一交鴛鴦博山褰溫火迷
迭流芬薌齊心偕婉變千秋殊未央歡愛不畢
席胡爲戒戎行萬里隔秦塞隴阪阻且長秦山
何奕奕隴水何湯湯乘障守玄菟寄書來白狼
上言遠別離相憶莫相忘下言未來歸斷絕摧
肝腸邊城七八月朔氣亦先涼笳吹咽明月沙

日厚堂詩集卷之四
六
磧飛嚴霜冥冥天漢遠嗷嗷鴻鴈翔白草接吐
谷大野秋茫茫都護夜擐甲健兒朝挽強飲馬
渡河水接戰陰山徧男兒思報國努力事邊疆
豈能中顧私綢繆永相將死當膏埜草生當還
故鄉讀罷長惋歎屑涕沾衣裳東家有美女姣
好齊諸姜十三工組繡十五織流黃十六爲中
婦夫壻尚書郎畫棟宿鸚鵡倚桐栢鳳凰比翼
旣乙乙和鳴亦鏘鏘足不出門樞身不離堂皇
舉案相却略熙熙何豫康物情有榮悴天道難
預量憶昔與君別握手臨河陽咬咬嚙黃鳥宛
宛垂朱楊臨岐何以贈爰結佩與纓芳草擷蘅
杜崇蘭折瓊芳相期在秋晏願言歸朔方何意
久行役十載空相望玉顏坐銷歇無復施紅妝
白首感秦烏頰尾嗟河魴愴怳失次第秉儀中
自坊妾命古來薄何爲獨摧傷

梅花引

灼灼隴頭梅禁寒半未開思君如玉樹清夢隔
瑤臺愁向江南寄春從笛裏催羅浮消息杳翠

鳥不會來

黃鵠篇

黃鵠舉兮翔八極忽中道兮亡其匹棄厥志兮
介以特匪故侶兮疇比翼鳳洩洩兮將厥妃鳴
噦噦兮上下于飛鵠兮鵠兮彼何辜兮援琴寫
怨兮中心悵而

黍離操

麥漸漸兮風肅肅日荒荒兮不明以煜爰瞻烏
兮誰之屋

招隱辭

山之桂兮叢叢水激激兮鳴迴風彼佳人兮曷
不我從駕飈輪兮騰飛龍 山之桂兮漠漠石
礪礪兮帶藂薄彼佳人兮不我作導玉軼兮矯
黃鵠 山之桂兮枝相樛崑崙兮黜以幽彼
佳人兮胡不我仇蔭芝蓋兮驟赤蚪

思歸引

遙遙洛陽道綿綿道傍草車馬日班班倏忽令
人老秋草雖負霜春風爲迴槁玄髮一以繁朱

顏寧再好會合良有時榮名爲誰保去去南山
隱言從綺與皓

烏栖曲 三首

博山熏爐蘇合香雙燕交栖文杏梁花枝入簾
日初午起炙銀箏調鴈柱

白門柳暗烏欲栖深院軸簾聞馬嘶青閣雙尊
九醞酒銀漢微茫落珠斗

却寒簾外春風寒美人罷舞羅衣單夜如何其
夜過半小苑銀床輓轡轉

上谷秋懷 四首

十載閒亭學草玄徵書一日起行邊驅車古道
羊腸折說劍秋風虎帳懸銅柱勛名歸破虜金
城方畧是屯田重門點點羶裘色盡道呼韓款
塞年

大漠高空肅羽翰霞城秋色擁馮闌鉦笳故促
嚴更曙裘帽先知絕塞寒啓事謬會題漢署籌
邊重許護樓蘭西河使者休驚問報國從來有
寸丹

高館踈燈夜未央
燕山越水意何長
九關層鑰通長樂
萬里寒雲起太行
霄漢有懷依紫極
江湖何處問滄浪
殊方極目偏秋色
南北鴻書正渺茫

金風颯颯墮關榆
朔氣全侵肘後符
浪跡廿年同塞馬
鄉心八月憶江鱸
玄都載鶴僊舟渺
愚谷停雲客夢孤
爲訊山中諸社伴
看花曾記遠人無

漢關壽亭侯像長歌

武安錚錚腸如鍊
吐吞河岳貫日月
正氣長留宇宙間
靈爽騎箕扈天闕
丹青彷彿見真容
虬髯燕頤方頤紅
空梁落月照顏色
叱咤萬馬鳴秋風
冰壺湛湛天如水
午夜挑燈讀左氏
百年盜賊何縱橫
列背盪鬣髮上指
生前未得殲孫曹
遺恨荆襄空壁壘
上帝畀之萬古權
神功赫赫騰八埏
兒童父老紛拜舞
雲旗鶴駕相周旋
嗚呼炎鼎今在否
霸業王圖誰不朽
獨餘徑寸爲劉心
三精兩曜同悠久
丈夫七尺時抖擻一

笑勛名等芻狗橐筆爲公一浩歌俯仰乾坤重
搔首

冬日借吳直指視塞雲州少憩靈真觀賦
塞北霜威淨遠氛前旌選勝入重雲真人紫氣
關門識內史玄言柱下聞石室藏春窺窈窕瑤
壇飛雪散繽紛馮虛東向長安日蓬闕遙瞻五
色文

詠赤城湯泉

望望霞城生紫煙千峯迴合湧溫泉初疑玉液
空中吐忽訝丹砂井底傳浴日煖將回上谷洗
兵春已徧祈連振衣愛聽銅鞮曲把酒臨風一
灑然

創虜歌

史夷外叛勾虜犯邊移余備兵赤城督諸將搗之其子紅亥就擒

赤城城頭月如練白龍堆裏風吹霰黃狐跳梁
追赤狐中夜馬嘶史酋遁潘籬自昔受羈縻久
豢一朝仍外叛幕南部落日招呼安免諸羌頗
精悍公然南牧躡秋原致令西顧勤宵旰嗟余
剖竹忝疆場安得輕裘唯讌衍元戎心膂僉叶

謀授律馮牙宣廟筭山搖雪色晃戈鋌雲閃日
光明組練一鼓雄將虎穴穿群醜驚風股先顫
射海寧留跋浪鯨燎原欲盡傾巢燕胡雛駢首
繫長纓遺孽游魂泣京觀尺書飛捷向長安文
幣朱提拜皇眷已看天威震五原敢謂天山定
三箭噫噉吁由來獫狁開邊患懾懾懷柔在救
變勤王回鶻豈附唐尚主烏孫終背漢曾聞丹
浦亦觀兵爲語清時莫忘戰

夜度雞鳴驛

萬疊河山開兩曜東西走夜夜鳴關雞喚醒征
人否

邊關易虜塵漢策陋和親借問棄繻者起舞是
何人

登獨石亭

鞭至自何年關門片碣懸孤根疑拔地遠勢欲
擎天鎮朔當三面名城寄一拳

獨石城
以此名登臨偏

慷慨尊酒嘯風烟

遊滴水崖朝陽觀

尊俎邊關有勝緣石門蘿磴倚雲穿半空晴滴
諸天雨大漠寒收萬壑烟丹壁凌霄排紫劍絲
毫飛霧濕青蓮將歸轉戀華陽色鼓角城頭夕
照懸

獨石臺新成同吳直指撫夷紀事

新築層臺俯大荒遙臨繡斧有輝光傳呼徧賜
名王酒號令清懸御史霜甲士九關屯虎豹風
雲萬里護金湯應知廟筭同羈馬謾道和戎似
漢唐

讀太僕王公平蠻督木傳賦五言排律二
十韻

秦岱山標名嶽齊都毓巨賢剛腸生似鐵古道直
於絃九折驅車過單騎祝網旋夷蠻回紇拜名
姓令公傳鬼國消鋒鏑蠶叢解倒懸用師賢十
萬舞羽格三千已播神君頌仍操匠石權明堂
供象構隆棟表祈年飛檄河山動程材杞梓連
風霜終歲苦瘴癘一身捐蹇蹇王臣瘁恢恢聖
主憐加卿酬茂列諭祭勒新阡異數雲霄上鴻

名日月前人皆推邁種天亦祐貞堅烏巷家聲
振槐堂世澤偏衣冠羔鴈集奕葉鳳毛騫俎豆
千秋薦哀榮萬福駢生人誰不死夫子自歸全
面貌瞻祠宇丰神照簡編通家應有述終媿筆
如椽

白登道中逢春感述

十年已乞據梧身那復邊關擁畫輪歲晚霜旌
仍道路天涯蓬鬢易風塵隴梅虛憶雲中使羌
管驚傳塞外春苒苒王孫芳草色五湖何日是
歸人

李子敬謁銓過訪赤城喜而有作兼懷鐵
城叅知

長憶山中侶俄驚塞上逢關河懸片月斗氣合
雙龍不盡南來語頻看別後容風鉦中夜發猶
認故園鍾

猿鶴應亡恙風塵祇自憐一麾隨白草萬里對
青蓮鄉夢逢春劇離愁付酒捐總輸河上叟長
日共鷗眠

朝陽觀對雪

絕塞衝寒賈壯遊朝陽名勝望中收
僊人壇俯三千界帝子宮懸十二樓
忽擁瑤華隨絳節俄看玉樹滿丹丘
高歌郢曲堪誰和咫尺天門紫氣浮

陪直指闕營校射二首

紫塞乘驄出觀兵
耀武威日光搖組甲霜色擁牙旂
鳴劔千山動投鞭萬馬飛
忽報名王縛軍前聽指揮

賈勇千夫競彎弓
五石強鏑鳴初落隼札破已穿楊
肅羽傳青海先聲走白狼
射生休近塞飛衛在疆場

夏入雲中韓憲使
惺菴招飲柳河得流字誰道風塵不壯遊
轅門咫尺是滄洲
雲峰倒擁樓船出柳浪
遙翻瀚海流客遇高陽偏縱酒
尊開河朔橫生秋
鳴撓忽動燕然色
還飲黃龍天際頭

後出塞有懷鐵城叅知遂寄斯章

遊子遠行役迢迢事戎行浮雲西南馳伊人天
一方驅車歷長坂四顧立房徨言念平生親奄
忽成參商紫芝秀瑤島白草蔓龍荒行邁踰幾
時所見儵以更奉身寄邊徼徘徊歌慨慷遐心
向風發客路隨波揚豈無銅柱標緬焉思滄浪
飛鴻渺南逝形影惜相望殷懃加飡飯眷此丹
玉房鐵崖高萬尋青蓮吐幽芳予懷諒匪石君
心安可忘歲晏結清歡千載殊未央

雪中送郭中丞歸東魯

令公聲望出東曹開府全宣節制勞下拜幾收
回紂馬中原移借呂虔刀牙旌曉暎星河發驛
路風含玉樹高二十四勛纒一考可容高枕負
中朝

將赴大梁留別上谷諸僚長

關塞論兵幾月明河梁攜手不勝情經年虎竹
叅方岳三月鶯花別友生匣劍曉寒分斗氣驪
歌風急雜邊聲亦知燕領真公等不薄盧龍塞
上名

過保安謁沈青霞先生祠

片片飛霞擁畫梁千秋祠宇肅蒸嘗生前請劍
排天闔死去騎箕至帝鄉白草含風淒九塞芳
蘭薰佩接三湘獨憐鐵馬桑乾道悵望南雲萬
里翔

送葛逸人之太和期來春過余東海

太岳尋僊去秋風信短筇逍遙身似鶴綽約道
猶龍秘檢空中授畸人天外逢蓬瀛應有意春
半許相從

樊季思謁銓訪余太梁賦此爲贈余與季
思築塢紫芝將煉藥老焉今各出山故未
句及之

中原萬里政相思河朔深杯慰別離一出舊山
驚鬢改幾回芳草夢春遲梁園柳暗聞鶯處燕
市花深踏馬時總爲食芝堪不老可教長負碧
山期

壬辰九日從諸公遊鴈塔曲江二院晚歸
簡涵臺憲長

河山百二擁神州賓主東南愜勝遊細把紫萸
酬令節放歌白苧散清秋峻嶒古刹中天見隱
約前朝曲水流卜夜不須辭醪酌淡烟新月總
堪留

客歲九月涵臺萬公攜遊曲江業成一詩
未寄今歲是日公書來自晉再用前韻却

寄

去年此日入雍州素節黃花憶舊遊客裏琴尊
偏卜夜書來鴻鴈又逢秋一時列岳聲華重萬

里懷人歲月流綵筆昔期霄漢上姓名應爲使

君留

公約聯詩鴈塔

清澗道中

平林漠漠帶滄洲澹澹清泉觸石流只少數鷗
飛向客轉教人憶好溪頭

雄石峽

禹鑿何年壁鷲雲榆關百二鎖氤氳朝宗水向
中原會峩峩天將北戒分刁斗風清屯列戍羆
熊秋健獵千羣穹廬指點燕然色擊劍酣歌挾

斗文

榆林中秋書懷 十首

三五月華流邊關賦遠遊影深烏鵲樹光冷驪
驢裘擊柝重門靜鳴砧萬馬秋及瓜猶未返空
自憶刀頭

有客行杯數無雲四望深光華生桂樹烽火淨
榆林北嶠棲歸翼南樓聞遠音呼尊莫惜醉來
夕異晴陰

桂闕中秋滿瓊樓萬里看蟾蜍渾自喜鳩鵲不
勝寒太宇浮埃散長門夜色闌前星應有燦翹
首五雲端

歲歲高堂讌琴尊泛月明一麾憐遠道孤影滯
邊城舞袖風霜妬趨庭歲月更玉關歸有日應
慰倚門情

忽改姮娥影凄然悲夜臺慈闈秋寂寞烏樹晚
徘徊衣線含風冷松楸奏壑哀有懷歌陟屺愁
絕不堪裁

涼月鑒羅幃邊衣着未宜閨砧空外斷鸞影夢

中疑豈誤靈娥藥誰成織錦詩安仁故有泪揮
灑向南枝

原上三年別看雲廢晝眠况當風月夜悵望鴈

鴻天宿草經秋暗

季弟
早世

繁荆哀露妍藍田多舊

業攜手艸堂前

谷口攜佳侶風期故自超賦詩多暇日問月幾
清宵今夕光同滿他鄉望轉遙濠梁幽興在猶
憶舊同招

玉盤掛天際兒女競相呼要爺一進酒隨母各
提壺出塞離群遠辭家勝事無小孫書昨至報
月又庭梧

愚谷谷中月好溪溪上船光浮山似玉波定水
如天鞅掌終何事賞心故自憐停杯欲有寄隴
樹隔蒼煙

余奉東撫之 命發自榆林父老殷勤戀
別媿而賦此

載銜新命發西陲父老追攀戀別離緩帶虛過
開府日爲霖喜值洗兵時也知宦薄鳩同拙翻

媿情深馬去遲回首并州天萬里朔雲邊月重
相思

虎牢關

三戰雄關百代名秦川漢月照空營太平不記
當年事只說西京向此行

宋陵

陵陷虜中被發掘不得祭我朝始祀

杯土難將玉匣藏七陵望祀隔錢唐驅除不是
逢明主雪耻誰堪報百王

會盟臺

萬騎東來此會盟烏烏擊缶是秦聲雄風已逐
浮雲散芳草荒原春自生

望少林

玉豸山前七佛峯名聯當時曾問祖師禪不知隻
履今何處邂逅相看又十年

甲辰春日赴秦計部高臺之宴賦此

崇臺高宴倚雲開百二河山睥睨來泃氣乍回
營畔柳春光先入掌中杯葡萄滿甕隨天馬簫
鼓終宵殷地雷十載重臨聽九部無妨車旆夜

深廻

余備兵榆林
今可十年

榆林虜旣款塞歲復有季李大將軍置酒
春宵盛張燈樂卽事有作

北門遲日淨胡沙西第開尊荅歲華雪霽高城
占得麥春回午夜爛生花星橋火樹霞千障歌
管樓臺月萬家更是投醪能饗士黃龍轟飲路
非賒

鐵城先生書訊邊事兼惠新詩奉荅二首

經年南北嘆離踪錦字遙天下塞鴻商皓九芝
看秀色漢庭萬石想高風雲連函谷關常紫花
滿僊都春欲紅歸計刀頭應使得扁舟同醉五
湖東

丈人尺素問籌邊爲報單于解辯年寧是犁庭
空老上祗應烽火息祁連壯心笑乏封侯骨歸
夢驚催種秫田獨有感時憐漆室杞人無力可
回天

有感時事
故云

元夕書懷

高館踈燈坐次寒那堪笳鼓競春宵參差兒女

經年別迢遞松楸萬里遙紫塞寒威催雪鬢玄
都清夢隔霞標停杯徙倚西堂月一曲關山黯
自調

樊季崇內弟五裘賦贈

翩翩公子政芳辰秩秩初筵祝大椿紫擷飛觴

珠薦履白眉流彩玉爲人家聲自昔傳驄馬伯

爲名御史庭瑞于今兆鳳麟遙挹華堂占聚宿兩家

群從託荀陳

太平宴歌

高皇首出乘六龍戎衣一掃羶羶空滅澤神威

薄海外重離化日當天中於鑠文皇明兩作

肅駕三犁卷沙漠北平奄宅奠神臯瀛海爲池

枕恒嶽九邊萬里開金湯增繒和親卑漢唐列

聖訏謨日光煜六師訓練時張皇不毛窮髮盡

賓服雕題黑齒咸梯航名王叩關日輸貢蒲桃

天馬隨銀甕聊將表餌示羈縻仍飭兵車雜耕

種榆林自昔雄三秦當關士馬何詵詵五花肅

整魚麗陣七萃齊開虎旅軍軍聲久聳套中虜

受降城西各分部卜莊黍養倏携心反覆渝盟
懷首鼠招要乘間復鷓張出沒無時還鳥舉至
尊西顧勤宵衣比屋黔黎未安堵憶昔提兵十
載前重承簡命復行邊申嚴號令軍容振兼布
恩威主德宣坐使先聲揚敵愾三路黠酋同款
塞稽崩受賜聽傳呼解辮纍纍望塵拜風清鈴
閣寂無譁綠耳臙脂入漢家城砦終宵息烽燧
穹廬亭障接龍沙王會新圖開赤縣太平有象
今仍見考鍾擊鼓集材官張幕椎牛事歡讌細
柳烟消列校營團花霞簇征袍茜牙旌赤羽映
轅門煦日和風滿郊甸宴安自古良足憂緩帶
寧爲肉食謀衣裯由來存炯戒昔聞雩旱仍資
舟韜戈臥鼓易生玩桑土先雨須綢繆還教痛
飲黃龍府重看勒石燕山頭振旅愷歌時九奏
淑氣休徵盈宇宙願言帝德紹唐虞小臣齊獻
南山壽

喜何无咎至自永嘉有作

爲客三春盡逢君萬里來人將今雨至懷向舊

日
醅開說劍雄心劇論文藻思催呼韓飛片檄好
向幕中裁

上春公讌卽席口占簡諸觀察

芳辰旨酒樂嘉賓千羽笙簧次第陳玉燭光調
天不夜金城烽靜地無塵尊前談笑千衝折塞
外傳呼萬部馴先雨更將桑土徹一杯持散十
方春

甲辰生日時在榆林

頻年蓬跡寄殊方初度逢春又舉觴三仕主恩
深歲月百季身鬢半星霜東來紫氣三峰近北
望黃雲萬里長荏苒秦關慙鎖鑰幕南新報款
名王

知非十載尚無聞

時年五
十有九

蓬矢平生媿策動筵

鼓椒尊迎塞日關河鄉樹擁春雲身因遲暮仍
加飯心契薰脩欲斷葷大藥僊都容易覓採芝
行與鹿麋羣

重遊雄石硤

曾題高碣憶并州十載行邊復此遊夾岸雲旂

開細柳當關天塹鎖清流解鞍士共投醪醉緩
帶名虛擬峴留唱罷銅鞮歸路白踈鍾新月正
南樓

汪鼎甫從余出塞嚮道甚勤詩以勗之且
訂僊都之約

大道絕紆曲信趾游康莊顧影一以疑臨岐泣
徬皇畸人奮至精芥端析毫芒金鏡刮內翳火
蓮開新芳嗟彼悠悠兒履錯空趨踰眯日月在
指亡羊穀與臧之子秉遐尚飯心禮大方徘徊

費瞻忽在再駛流光一斑詎窺全七襄未成章
竭來事荒微寒標厲秋霜一人雄九軍萬敵敢
披猖疑義恣探討起予多勗勦貌肥戰初勝意
得言俱忘直入無窮門大同乎混茫此日難再
得彼岸期相將僊都屹天柱赤壁頽滄浪歸雲
堪託宿振衣凌高岡懸崖一撒赤九萬同翱翔
我心諒匪席君腸勁於鋼精進復精進勗哉殊
未央

月夕

當暑晚涼生娟娟月近城微雲絕點綴過雨益
分明鳥弄深栖影鍾回出定聲居心元自淨卽
境有餘清

夏日赴秦計部郊讌

邊關息烽燧四郊淨無塵河朔有嘉招趣駕之
西闔玉門風物遲五月成暮春平疇翠方積細
柳綠已勻葡萄出新釀瓜李錯庶珍說劔紛俛
仰笙簧雜前陳投醪逮衛士歌薰阜農人開襟
延遠色縱目芹河濱雙虹偃飛梁萬馬飲通津
雨餘暑更薄天長地如伸臨濠動遐想景會神
俱親日落迴輕車揮戈復逡巡銅鞮凌風發接
羅倒着巾時清足緩帶重來及芳辰



當暑晚涼生娟娟月近城微雲絕點綴過雨益
分明鳥弄深栖影鍾回出定聲居心元自淨卽
境有餘清

夏日赴秦計部郊讌

邊關息烽燧四郊淨無塵河朔有嘉招趣駕之
西闈玉門風物遲五月成暮春平疇翠方積細
柳綠已勻葡萄出新釀瓜李錯庶珍說劔紛俛
仰笙簧雜前陳投醪逮衛士歌薰阜農人開襟
延遠色縱目芹河濱雙虹偃飛梁萬馬飲通津
雨餘暑更薄天長地如伸臨濠動遐想景會神
俱親日落迴輕車揮戈復逡巡銅鞮凌風發接
羅倒着巾時清足緩帶重來及芳辰

日房集言集
卷之四

三

國



聖